

Missingersuusiortarnermut inatsisip kukkunersiorneranut ingerlasumut atatillugu, takukkit ataani siunnersuummut tunngavilersuutit 1-miik 6-mut, matumuuna missingersuusiortarneq pillugu inatsisip kingusinnerpaamik UKA2013 allanngortinnissaanik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut
(Inatsisartunut ilaasortaq Andreas Uldum, Demokraatit)

Akissuteqaat

(Aningaasaqarnermut Naalakkersuisoq)

Aappassaaneerneqarnera

Naalakkersuisut sinnerlugit Aningaasaqarnermut Akileraartarnernullu Ataatsimiititaliaq qutsavigissavara aalajangiiffigisassatut siunnersuutip suliarineranut atatillugu sukumiisumik suliaqarsimaneranik.

Naalakkersuisut naamagisimaarlugu maluginiarpaat ataatsimiititaliaq missingersuusiortarnermut inatsimmut tunngatillugu Naalakkersuisut tamakkiisumik isumaannut isumaqataasoq.

Ataatsimiititaliap oqaaseqaataanut allannguutissatullu siunnersuutaanut tunngatillugu imatut oqaaseqassaanga:

Ataatsimiititaliaq isumaliutissiisummini allappoq sanaartugassanut annertunerusunut soorlu erngup nukinganik innaallagissiorfiliassanut tunngatillugu akuersissuteqarnissaminut piginnaasaqarlutik, tamassumalu oqaatigineqarnissaa pisariaqartillugu. Naalakkersuisut aalajangersakkat atuuttut arajutsimanngilluinnarpaat. Tamannali aningaasaliissutit taamak annertutigisut Inatsisartunit tamarmiusunit akuerineqartarnissaanik Naalakkersuisut tunngaviusumik isumaannik allanngortitsinngilaq.

Sanaartorneq pillugu nassuiaat 2011-p suli tunniunneqannginneranut Nunatta Karsiata naatsorsuutaasa naammassineqarnissaata kinguaattoorneranik pissuteqarpoq. Nunatta Karsiata naatsorsuutaasa kinguaattoorneranut pissutaavoq Aningaasaqarnermut Naalakkersuisoqarfiup kukkunersuisoq peqatigalugu taarsigassarsitsinernut kontonik misissueqqissaartariaqarsimaneranik, tassunga ilanngullugit kontot Sanaartornermut Iluarsartuusseqqinnernullu Aningaasaateqarfimmut toqqaannartumik sunniuteqartussat. Suliaq tamanna naammassineqarsimalerpoq, taamaasillutillu naatsorsuutit agguaneqarsimalerlutik. Naatsorsuutit naammassineqarsimasut tunngavigalugit taamaasilluni Sanaartornermut nassuiaat naammassillugu allanneqarsinnaalerpoq. Tamanna assersuutissatsialaavoq ataatsimut nassitsisoqartarnissaanik siunnersuut piviusunngortinneqarsimasuuppat, naatsorsuutit suli kinguaattoornerusalerneranik kinguneqarsinnaaneranut.

Naatsorsuutit aammalu Sanaartorneq pillugu nassuiaatip 2012-p suliarineranut atatillugu pissutsit allat sunniuteqaqataasinnaasersut massakkut oqaatigineqarsinnaanngilaq. Naalakkersuisulli erseqissaatigissavaat missingersuusiortarnermut inatsimmi § 24-imi taamaallaat allassimammat sanaartorneq pillugu ukiut tamaasa nassuiaasiortoqartassasoq. Naalakkersuisut ukiut tamaasa nassuiaammik saqqummiisarput, taamaattumillu saqqummiisarnerit eqqarsaatigalugit ataatsimiititaliap allassimasaraluatut

oqartoqarsinnaangilaq ”tamanna missingersuussiortarnermi inatsimmi aalajangersakkanut naapertuutinnitsoq”.

Ataatsimiititaliap kissaatigaa nassuiaat inatsisartunit suliarineqassasoq, tamannalu Naalakkersuisunit tusaatissatut tiguneqarpoq.

Inatsisartut aningaasaliissutaanut tunngatillugu innersuusutit eqqarsaatigalugit aalajangersaasoqarnissaanik ataatsimiititaliap siunnersuutaa Naalakkersuisunit aaqqiissutissatut pitsaasutut isigineqarpoq, tamanna ersarinnerusumik saqqummiisalnissamik kinguneqassammat inatsisillu eqqarsaatigalugit teknikkikkut attanneqarsinnaammat.

Naggasiullugu Naalakkersuisut erseqqissaatigissavaat UKA2013-imut tunngatillugu piffissaliussassatut siunnersuut pissusissamisunngitsutut suli isigineqarmat, soorluttaaq inimi partiit oqaaseqartuisa arlallit tamanna aamma oqaatigereeraat. Tamatuma kingunerisinnaavaa missingersuussiortarnermut inatsisip arlaleriarlugu allanngortittariaqartarsinnaannissaa.

Naalakkersuisut taamaasillutik allannguutissatut siunnersuut, Naalakkersuisut allannguutissatut siunnertuutip siullermeerneqarneranut atatillugu saqqummiunneqartup taartissaa. Allannguutissatut siunnersuut tunniussinissamut ullormik killiligaangilaq, kisianni Aningaasaqarnermut Akileraartarnermullu Ataatsimiititaliap allannguutissatut siunnersuutaata assingaa:

”Missingersuussiortarnermut inatsisip kukkunersiorneranut ingerlasumut atatillugu, takukkit ataani siunnersuummut tunngavilersuutit 1-miik 5-imut, matumuuna missingersuussiortarneq pillugu inatsisip allanngortinnissaanik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut

- 1. Inatsimmi oqaatsit atorineqartut Namminersornerup eqqunneqarneranut tulluussartariaqarput.**
- 2. Ersarissarneqassaaq, sanaartugassaq aallartinneqarsinnaasoq, sanaartugassap akia tamakkiisoq Inatsisartunit imaluunniit Aningaasaqarnermut Ataatsimiititaliamit akuerineqarsimalerpat.**
- 3. Sanaartornermut nassuiaat Inatsisartunit isumaqatigiinniutigineqartussanngorlugu immikkoortut nalunaarutigineqassaaq.**
- 4. Missingersuussiortarnermut malittarisassat killiffia nukittorsartariaqarpoq, taamaasilluni Missingersuussiortarnermut Inatsimmi allassimalerlugu, regulativini aalajangersakkanut tunngatillugu immikkut akuersissuteqartoqarsinnaangitsoq.**
- 5. Ersarissarneqassaaq, Inatsisartut aningaasaliisarnerannut taakkunanngalu allannguineranut akisussaaneq Inatsisartut Suleriaaseq pillugu Ataatsimiititaliaaniimmat”**

Taamatut oqaaseqarlunga allannguutissatut siunnersuutip massuma akuersissutigineqarnissaa Naalakkersuisut sinnerlugit inassutigissavara.